

Nomen patris Bhojadêva, matris Râmâdêvî ipse posteritati tradidisset noster, si eius esset, quod fine poematis legitur distichon. Attamen post conclusionem poematis id παρέλκει, inseruisset notitiam, qui est mos suus, Jayadêvas cantilenae cuidam, et movet nomen Bhojadêvae suspicionem, quam in annotatione in medium protuli. Potest tamen indicata esse, qua vixerit aetate Jayadêvas mentione Bhojae regis, qui inter annos p. Chr. n. ML. et MC. regnavit. Vid. Toddium et Colebr. in Trans. Soc. As. Lond. I. 223. 231. Nimirum ita, ut istis versibus dictum sit, posteriorem esse Jayadêvam Bhoja et poetis annumerandum, qui post Bhojam mortuum floruerint. Nam eadem aetas utrique tribui non potest. De qua re mox dicam. Uxoris nomen Padmâvatî carmini inseruit poeta. X. 9.

II. Videtis haec exigua esse, neque eiusmodi, ut inde, quod maioris nobis esset momenti, de aetate, ceterisque Jayadêvae rebus certi quid erui possit. Nota est opinio Jonesii, sive potius magistrorum Indicorum, a quibus Indicis litteris instituebatur, anteriorem fuisse Jayadêvam Kâlidâsa, quam sententiam vix hodie ullus suam faciet. Redolet enim Gîtâgovinda indolem aevi longe posterioris. Sermo, licet a calamistris Bhavabhûtis, atque a dumetis Nalodayae aequè abhorreat, et ad nitidam Kâlidâsae elegantiam saepius accedat, verborum interdum quam rerum est studiosior et a tautologia non prorsus alienus; interdum nimis sane lusitat in eadem imagine varianda. Participiales adiectivorum a nominibus oriundorum formae (nam denominativum eiusdem originis verbum non ubique assumendum est) a recentioribus poetis omnino magis frequentantur, quam ab antiquis; cf. quae annotavi ad Hitop. I. d. 9. Kâlidâsae tamen, ut taceam Bhavabhûtem, minime sunt inusitatae. Exempla per Gîtâgovindam haud pauca inveniuntur. Magis memorabilia sunt, quae IV. 10 leguntur, denominativa verba, quandoquidem composita nomina in verborum formam abiere, qualibus vix usus fuisset Kâlidâsas. Ad certam aetatem tamen ea referri posse longe absum ut credam. Magis huc facit versuum ratio, quae a cantilenis Sanscriticis apud anteriores aliena est et in Sanscritam a Prâcriticis linguis tralata videtur. Accedit concinen-